

Liklik nius long

prea,

givism na fo

EBC Wok Misin

NIUSLETA NO. 65 EPRIL 2018

DIA OL PREN BILONG WOK MISIN!

Mipela i amamas long salim dispela niusleta No. 65 long yupela ol kongrigesen. Yupela ol misin diken i ken makim sampela bratasusa long ritim ol ripot long taim bilong lotu long Sande long 29 Epril, 2018. Ofa long dispela Sande i go long sapotim wok misin. Tenkyu tru long prea bilong yupela ol bratasusa i harim ol dispela ripot.

Adres bilong salim mani:

EBC Overseas Mission
BSP Goroka Branch
No. 1000 751 861

OI Fild Adres:

Mike Kaire

EBC Community Service
P.O. Box 250, Dili, East Timor
Mobile: (00) 670 77757402
Email: mikekaire@gmail.com

Sifu Family

STT BMW Papua
Nabire 98802
HP: 0852-1357-0016/
0812-48620-831
Phone: (+628) 124 8620831
Email: sifuutina1@gmail.com

Missions Mobiliser

Muko Aveo
missions.mobiliser.ebc@gmail.com
Mobile: 72681881

Liklik nius long EBC Wok Misin

Design & Printing by:
EBC Publications Department, Lae

Ol dia bratasusa long wok misin, mipela i wisim yupela blesing bilong God long nupela yia. Bikpela Jisas Kraus, King bilong bel isi na bilong i stap oltaim oltaim i ken lukautim na blesim yupela wanwan long 2018.

Bikpela i tok olsem, **"Yu no inap mekim wok long strong bilong ami o long strong bilong yu yet. Nogat. Strong bilong spirit bilong mi bai i stap wantaim yu, na long dispela strong tasol bai yu mekim wok." Sekaraia 4.6b**

Wanpela taim wanpela yangpela man, Pol i go painim wok long wanpela bikpela forestri kampani. Menesa i putim wanpela tamiok long han bilong en na i tok, "Yu mas katim 10-pela diwai long wanwan de." Pol i go aut na stat long katim 10-pela diwai long wanwan de. Tasol bihain long sampela wik, Pol i stat long lusim strong na amamas bilong wok i laik go pinis. Maski Pol i save taitim bun tru yet em i no inap winim 10-pela diwai, na i katim 8-pela long wanpela na 6-pela long narapela de. Menesa i no amamas long wok bilong Pol na i tokim em, "I luk olsem yu no sapim tamiok bilong yu gut." Tru tumas Pol i tingting long katim diwai tasol em i no gat taim long sapim tamiok, long dispela as em i no inap.

Long mekim wok bilong God, yumi nidim stia, strong na amamas Holi Spirit i save givism. Yumi i no inap mekim wok bilong God wantaim strong, save na tingting bilong yumi yet. Wanwan de yumi kisim taim long prea na stadi long Tok bilong God, dispela bai i kirapim yumi long givism wantaim amamas, prea wantaim krai long bel na amamas long autim nem bilong en.

IS TIMOR

Brata Mike na susa Manganen i kamap long PNG long 6 Februari long stap tupela mun holide. Tupela bai i go bek long Is Timor long mun Epril.

God i helpim na tupela i lusim olupela haus bilong tupela na muv i go insait long nupela Baibel Skul long ples Loes.

Sampela haus i sanap pinis na ol i stat long mekim gaden na lukautim ol meme.

"Mitupela susa Manganen i laik tok bikpela tenkyu stret long sapot na prea yupela i save givism mipela na wok long Is Timor. Tru tumas, prea bilong yupela i muvim planti wok long Is Timor na mipela i askim bai yupela i ken i go on long prea yet.

Mi go on long trenim ol pasto na evangelis long ol i mas skulim ol Timor lain long Tok Tru.

Sios long ples Borai, God i helpim tru na ol manmeri na pikinini i save kam gut tru long lotu. Sampela nupela pes i wok long kam long lotu na ol i tok olsem, "Tru planti ol arapela naispela sios i stap raun tasol bel bilong mipela i save kirap long kam long sios bilong yupela". Mipela i tenkyu long God, em i wanpela mirakel long harim kain tok olsem long ol manmeri.

Mipela i save mekim kindergarten na pre-skul long ol liklik pikinini insait long hauslotu namel long wik. Planti



i amamas long bringim ol pikinini i kam.

Mi wok yet long registerim ogenesesen bilong yumi yet, "EBC Community Services" wantaim gavman bilong Is Timor.

Nau yet i nogat wanpela i stap long tanim tokples Tetun long ol dispela pepa i go long tokples "Portugal". Sapos mipela i painim wanpela, dispela bai i helpim long tanim tokples na mipela i ken regista wantaim gavman bilong Is Timor.

Prea, dispela rot i ken op long salim misinari bilong yumi PNG yet i ken i go wok misin long Is Timor.

NABIRE – WES PAPUA

Brata Sifu famili i kam bek pinis na nau i stap long holide long Kainantu. Taim ol i malolo, ol i wok long stretim pepa wok bilong aplai long nupela visa. EBC PNG i askim Evangelical Church of Papua (ECP) long ol inap helpim famili Sifu long kisim visa long wanem ol ECP i gat misin fil bilong ol tu i stap long Wes Papua. Ol i tok orait pinis long ECP long Wes Papua i ken wok wantaim Gavman bilong Indonesia inap ol i ken tok orait na givim visa long famili Sifu. God i helpim na ol i kisim 1 yia visa pinis na ol i go bek long Nabire long mekim wok.



OPERESEN MOBILAISESEN (OM)

Tenkyu long God i bin singautim sampela sumatin husat i bin pinis long univesiti long PNG na CLTC long go wok long sip Logos Hope. Ol bai i kam bek long pinis bilong Februeri.

Yumi laik tingim Kawanda inap God i ken stiaim em long dispela taim we em i painim pes bilong God long wanpela gutpela skul long kisim Intenesenel laisens.

WOK MISIN BILONG MAMA SIOS

Mama sios i no save lusim yumi liklik long prea, sapot long mani na tu givim misinari yet i kam long yumi. Em i gat sampela misin fil bilong en long sampela hap bilong world olsem Bolivia, Ghana, Austria na Canada na wantaim ol arapela patna ogenesesen olsem MAF, OM, Voice of Martyrs, Frontiers na sampela arapela ogenesesen tu. Plis prea long ol misinari bilong mama sios i stap long planti hap long dispela graun bai God i ken blesim na strongim ol moa yet.

PNG INLAN MISIN

Yumi laik prea na tok tenkyu long tok i stap long Habakuk 2.14, "***Na olgeta manmeri na olgeta samting long graun bai i save tru long biknem na strong bilong Bikpela. Dispela save bai inapim olgeta hap graun olsem solwara i inapim mak bilong en olgeta.***" Gutnius i kisim strong insait long PNG na i wok long gro yet i go.

Kiunga – Tenkyu long God i wok moa yet long ol Wes Papua lain we seket Kugark i wok yet long bringim gutnius long Kiunga na i go moa yet long boda bilong Indonesia na PNG. Bel bilong ol Wes Papua lain i op tru long harim Tok bilong God.

Manus – Yumi laik tingim Evangelis Tumbé na ol tim bilong en long dispela provins. God i blesim wok bilong ol long Manus.

Kavieng, Rabaul na Kimbe – Tenkyu long God i wok long ol dispela provins, plis prea inap God i ken putim paia moa yet long laip bilong ol Kristen long dispela hap inap planti asples i ken tanim bel.

Bougainville – Tenkyu long God i mekim bikpela wok long Bougainville. Sampela lain i tanim bel, prea God i ken strongim ol bratasusa husat i go

pas long autim gutnius. God i ken blesim na strongim wok bilong ol.

Kerema na Kaintiba – Tenkyu long wok bilong God long dispela provins. God i ken strongim bilip bilong ol Kerema lain. Ol yet i autim tok long ol lain bilong ol yet na long rot bilong Radio Kerema tu.

Central Provins – Papua – Tenkyu long God i wok yet long Central Provins. Prea olgeta Papua lain bai lusim kainkain tudak bilong dispela graun na bai bilip tru long wok bilong Jisas.

Milne Bay – Samarai – Prea long wokman Ginga Wuri na famili inap God i ken strongim na banisim ol long kainkain samting bilong dispela graun. Prea tu long God i ken strongim bilip bilong ol nupela Kristen.

Tingim tu ol arapela nupela ples insait long PNG we gutnius i go. Prea bai God i ken strongim ol.

TENKYU NA ASKIM POIN

- Tenkyu long God i blesim wok long ples Loes we nupela Baibel Skul i stap.
- Tenkyu long God i bringim ol nupela lain i kam long sios long Borai.
- Tenkyu long God i helpim na famili Sifu i kisim visa long 1 yia pinis.
- Tenkyu long God i blesim olgeta inlan wok misin long PNG.

ASKIM POIN

- Prea long God i ken helpim na rejistresen bilong EBC Community Services wantaim gavman bilong Is Timor i ken go gut.
- Prea long God i ken blesim holide bilong Mike na Mangen.
- Prea God i ken strongim na blesim olgeta wok manmeri long inlan wok misin.
- Prea long God i ken blesim trening bilong Josef famili long Baibelskul Lae.